

# **die Junge vo de Alte Stainlemer**



## **Jungi Garde**

### Fasnacht 2016

Sujet:

## **B wie Bombestimmig**

Wottsch neijerdings in d Innstadt  
kaa s bassiere, s isch nid gladd,  
ass de an dr Heuwoog strandisch  
oder an dr Mäss uss landisch,  
will e Witzbold, kasch nid lache,  
maint, är miess e Spässli mache.

S Rezäpt isch aifach, kasch nid z bleed syy,  
das begryfft e jeeede Gleezi,  
nimmsch e Ruggsagg oder Däsche,  
leggsch dry e Droot und au e Fläsche,  
losch s ganze non e Bitzli tigge,  
scho kasch e ganzi Stadt verzigge.

Glyy stöön in Schaare Schugger umme,  
und hän s Gfyyl, sii sin die Dumme,  
au d Fyrrweer luegt bedroffe dry,  
daas sott e gailen Yysatz syy??  
Und d Sanideeter nääbedraa  
luege sich nur rootloos aa.

Uf aimool schittlet ain sy Grind  
und maint, hän unsri Zircherfrind  
nid e soone glaine Maa,  
wo me uf Bombe hetze kaa?  
Das isch genial, maint sofort jeeede,  
doch wär will mit de Zürcher reede?

Denn nach schlabbe zwei drei Stunde  
het me doch e Löösig gfunde.  
S Yysatztyym us Züri noot  
villicht e ganz glai Bitzli spoot.  
He nai, nach Kurzem wird scho glacht,  
s het ain jo nur e Spässli gmacht.

Doch hesch gmaint jetz isch es umme,  
gheersch au duu nur zue de Dumme!  
Im Wuchetaggd wird Panik gschoobe,  
und als Kommentar vo oobe  
maint d Regierig ooni Gfasel,  
s herrscht e Bombestimmig z Basel.

Will ain e Gschäft vernichtet haa,  
scho ruggd s Tyym us Züri aa!  
Stoot ain mit Schnauzbart nääbedraa,  
scho ruggd s Tyym us Züri aa.  
Hesch duu Lämbbe mit dyym Maa,  
scho ruggd s Tyym us Züri aa.  
Het e Psycho s Rysse ghaa,  
scho ruggd s Tyym us Züri aa.  
Tiggd s nääbedraa im Seggdor A,  
scho ruggd s Tyym us Züri aa.  
Und au bim Päggli uf dr Boscht  
luege d Zircher nooch bigoscht.  
S Lääben isch, mir saage s drastisch  
z Basel nümme seer bombastisch!

Und luegt me wältwyt, merggd me grimmig,  
s herrscht überall e Bombestimmig!  
D Wält bestoot nur us Despoote  
und hirnverbrennte Idioote.  
Statt s Lääbe sich e Bitz z erhälle  
wämmert s uns nur no vergälle.

Drei Dääg soll dä Fruscht verschwinde,  
denn mir dien e Bombe zinde!  
Bewyyse, ass s au anderscht goot,  
wenn ganz Basel zämmestoot,  
drummlet, pfyfft und musiziert  
und in e Fasnachtsdraum entfert!

D Ladäärnen-Uusstellig uff em Münschterplatz,  
d Waagen- und Requisiten-Uusstellig uff em Kasäärneplatz  
sinn vom Määntig znacht bis am Mittwuch demorge.



Als Bueb kunnsch nadüürlig zue de **Alte Stainlemer !**

Namme: .....

Voornamme: .....

Strooss: .....

PLZ / Ort: ..... Joorgang: .....

Schigg die Aamäldig an Obmaa vo de Junge:  
Pascal Mutschler, Baumgartenweg 15, 4123 Allschwil oder lütt  
em doch aifach aa: Delifoond 076 589 17 53  
oder schigg en E-Mail an: p.mutschler@stainlemer.ch

oder kumm in unsere Käller go schnuppere  
am Samschdig 20. oder 27. Februar 2016

zwüsche zwai und vieri am Noomidaag

am Aubärg 2b (bi dr Heuwoog)

Cliquekällerbesichtigung und Apéro für alli Eltere

oder mäld dy under: [www.jungi-stainlemer.ch](http://www.jungi-stainlemer.ch)